



Na osnovu člana člana 82f. Zakona o izvršenju Budžeta Tuzlanskog kantona za 2020. godinu ("Službene novine Tuzlanskog kantona", broj: 16/19 i 7/20), a u vezi sa članom 6. stav 2. Zakona o subvenciji za ublažavanja posljedica uzrokovanih stanjem nesreće ("Službene novine Tuzlanskog kantona", broj: 6/20), Ministarstvo privrede Tuzlanskog kantona raspisuje

JAVNI POZIV

za dodjelu sredstava za subvencioniranje neto plaće - maksimalno do visine minimalne neto plaće za april i maj 2020. godine

1. Predmet Javnog poziva

Predmet Javnog poziva je prikupljanje prijave za odabir korisnika subvencije utvrđenih u Zakonu o subvenciji za ublažavanje posljedica uzrokovanih stanjem nesreće.

Pozivaju se pravna lica, odnosno privredna društva i fizička lica/obrtnici koji samostalno obavljaju registrovanu poslovnu djelatnost na području Tuzlanskog kantona (izuzev javnih preduzeća, banaka i drugih finansijskih organizacija, udruženja, javnih institucija, organa uprave, organa i jedinica lokalne samouprave), da podnesu Zahtjev za dodjelu finansijskih sredstava za subvencioniranje neto plaće - maksimalno do visine minimalne neto plaće za april i maj 2020. godine.

2. Pravo na korištenje subvencije

Pravo na korištenje subvencije imaju pravna lica, odnosno privredna društva i fizička lica/obrtnici koji samostalno obavljaju registrovanu poslovnu djelatnost na području Tuzlanskog kantona (izuzev javnih preduzeća, banaka i drugih finansijskih organizacija, udruženja, javnih institucija, organa uprave, organa i jedinica lokalne samouprave), kojima je naredbama štabova civilne zaštite zabranjeno obavljanje djelatnosti kao i kojima je naredbama štabova civilne zaštite indirektno onemogućen rad.

U skladu sa Odlukom Vlade Tuzlanskog kantona broj: 02/1-11-11421/20 od 02.06.2020. godine indirektno onemogućen rad odnosi se na:

- korisnike koji nisu bili u mogućnosti obavljati djelatnost zbog lokacije poslovnog prostora u tržnim centrima,
- korisnike iz djelatnosti po klasifikacionoj djelatnosti - KD 2010:
 - 55-smještaj (osim poslovnih subjekata koji se bave pružanjem smještaja, a koji su Rješenjima Federalnog ministarstva zdravstva bili određeni kao karantin na području Tuzlanskog kantona)
 - 79.1-djelatnost putničkih agencija i turoperatora.

3. Oblik subvencije

Sredstva za subvenciju će biti odobrena u obliku isplate određenog iznosa, maksimalno do visine minimalne neto plaće po svakom radniku, počevši od obračuna i isplate neto plaće za april i maj 2020. godine, bez obzira na iznos isplaćene neto plaće od strane poslodavca.

Isplata određenog iznosa, maksimalno do visine neto plaće podrazumijeva da, nakon što porezni obveznik izvrši obračun i isplatu neto plaće radnika, ostvaruje pravo na refundaciju obračunate i isplaćene neto plaće u određenom iznosu maksimalno do visine minimalne neto plaće iz sredstava Budžeta Tuzlanskog kantona za 2020. godinu.

Visina subvencije određivat će se Odlukom Vlade Tuzlanskog kantona za svaki mjesec pojedinačno.

4. Uslovi za dodjelu sredstava

Podnosioci zahtjeva obavezni su ispunjavati sljedeće uslove:

- da ima sjedište, odnosno registrovanu poslovnu jedinicu na području Tuzlanskog kantona,
- da je porezni obveznik zaključno sa januarom 2020. godine obračunao i isplatio plaće sa pripadajućim porezima i doprinosima, što se dokazuje uvjerenjem nadležne porezne uprave ili da ima izmirene obaveze po osnovu sporazuma sa nadležnom poreznom upravom o izmirenju duga po osnovu poreza i doprinosa, kao i oni na koje se odnose federalni propisi o finansijskoj konsolidaciji,
- da im je naredbama štabova civilne zaštite zabranjeno obavljanje djelatnosti ili im je indirektno onemogućen rad naredbama štabova civilne zaštite,
- da trenutni broj prijavljenih radnika nije manji u odnosu na broj radnika prijavljenih na dan 29.02.2020. godine, osim onih radnika kojima je istekao ugovor o radu,
- da imaju šifru djelatnosti na Obavještenju o razvrstavanju poslovnog subjekta - pravnog/fizičkog lica prema klasifikaciji djelatnosti (u skladu sa KD BiH 2010) i uslovima koji su pobrojani na listi u prilogu javnog poziva (Obrazac Lista zabranjenih djelatnosti).

5. Potrebna dokumentacija

Uz zahtjev za prijavu za odobravanje finansijskih sredstava pravna i fizička lica dužna su dostaviti sljedeće:

1. Izvod iz sudskog registra za pravna lica odnosno rješenje o registraciji od nadležnog gradskog/općinskog organa za fizička lica/obrtnici (fotokopija ovjerena od strane nadležnog organa);
2. Uvjerenje nadležne porezne uprave da je porezni obveznik zaključno sa januarom 2020. godine obračunao i isplatio plaće sa pripadajućim porezima i doprinosima, ili da ima izmirene obaveze po osnovu sporazuma sa nadležnom poreznom upravom o izmirenju duga po osnovu poreza i doprinosa, kao i oni na koje se odnose federalni propisi o finansijskoj konsolidaciji (original), dok fizička lica koja porez na dohodak plaćaju u paušalnom iznosu dostavljaju kopiju rješenja nadležne porezne ispostave o odobravanju plaćanja poreza na dohodak u paušalnom iznosu ovjerenu od strane nadležnog organa;
3. Izjavu da trenutni broj prijavljenih radnika nije manji u odnosu na broj radnika prijavljenih na dan 29.02.2020. godine, osim onih radnika kojima je istekao ugovor o radu ovjerenu od strane nadležnog organa;
4. Izjavu o isplaćenim plaćama za radnike u radnom odnosu kod pravnih i fizičkih lica za periode od 01.04.2020. godine do 30.04.2020. godine i od 01.05.2020. godine do 31.05.2020. godine ovjerenu od strane nadležnog organa;

5. Kopiju Obavještenja o razvrstavanju poslovnog subjekta - pravnog lica odnosno fizičkog lica prema klasifikaciji djelatnosti;
6. Kopiju ugovora o radu na određeno vrijeme i kopiju odluke/rješenja o prestanku radnog odnosa (ukoliko je bilo slučajeva prestanka ugovora o radu na određeno vrijeme);
7. Kopiju odluke/rješenja o prestanku radnog odnosa zbog odlaska u penziju (ukoliko je bilo slučajeva prestanka ugovora o radu po osnovu penzionisanja).

Ministarstvo privrede zadržava pravo da od podnosioca zahtjeva zatraži dodatnu dokumentaciju kao i pravo provjere svih podataka navedenih u dostavljenoj dokumentaciji.

6. Odluka o odobravanju sredstava

Odluku o odobravanju sredstava korisnicima subvencije donosi Vlada Tuzlanskog kantona. Odluka će biti objavljena u Službenim novinama Tuzlanskog kantona i na web stranici Vlade Tuzlanskog kantona: <http://www.vladatk.gov.ba/> i ista će biti dostavljena korisnicima putem e-maila navedenog u Zahtjevu za prijavu.

7. Opće odredbe

- a) Tekst Javnog poziva, Zahtjev za prijavu i ostali prateći dokumenti dostupni su na web stranici Vlade Tuzlanskog kantona: <http://www.vladatk.gov.ba/>;
- b) Podnosilac prijave obavezno popunjava sve rubrike Zahtjeva i odgovara za vjerodostojnost svih unesenih podataka;
- c) Nepotpune, neuredne i neblagovremene prijave neće biti predmet razmatranja.

8. Način podnošenja prijave

Ovjeren i potpisan zahtjev sa pratećom dokumentacijom dostavlja se Ministarstvu privrede na centralnu pisarnicu Vlade TK ili putem pošte na adresu:

TUZLANSKI KANTON
MINISTARSTVO PRIVREDE
KOMISIJA ZA DODJELU SREDSTAVA ZA SUBVENCIONIRANJE NETO PLAĆE
(sa naznakom "PRAVNO LICE" ili "FIZIČKO LICE-OBRT")
"N E O T V A R A J"
Rudarska 57
75000 Tuzla

9. Rok za prijavu

Javni poziv ostaje otvoren 10 dana, a krajnji rok za dostavljanje zahtjeva je 13.06.2020.godine.

Sve dodatne informacije vezane za Javni poziv mogu se dobiti svakim radnim danom na brojeve telefona: 035/369-327, 035/369-357 i 035/369-353 i putem e-mail-a: mp@tk.kim.ba.

10. Izvještavanje o utrošku sredstava

Korisnici sredstava obavezni su dodijeljena sredstva koristiti namjenski i dužni su podnijeti izvještaj o namjenskom utrošku sredstava (dostupan na web stranici Vlade Tuzlanskog kantona) sa dokumentacijom kojom se dokazuje utrošak sredstava u roku od 15 dana od dana doznačavanja sredstava na transakcijski račun korisnika subvencije.

11. Ostale odredbe

Na web stranici Vlade Tuzlanskog kantona : <http://www.vladatk.gov.ba/> bit će objavljen:

- a) JAVNI POZIV za odabir korisnika subvencije,
- b) Zahtjev za prijavu,
- c) Izjava o zadržanom broju radnika,
- d) Izjava o isplaćenim plaćama za radnike,
- e) Lista zabranjenih djelatnosti,
- f) Format izvještaja o namjenskom utrošku sredstava.

Napomena

- Ukoliko šifra djelatnosti pravnog odnosno fizičkog lica u skladu sa KD BiH 2010 nije navedena u Listi zabranjenih djelatnosti koja je u prilogu javnog poziva, pravno odnosno fizičko lice u Zahtjevu za prijavu je dužno da obavezno navede broj i datum naredbe izdate od strane Štabova civilne zaštite (u dijelu Opći podaci - Šifra djelatnosti po KD BiH 2010).
- Pravo na dodjelu subvencija neće imati podnosioci zahtjeva koji su već ostvarili pravo na subvenciju neto plaće iz drugih izvora za predmetni mjesec.
- Prispjela dokumentacija neće se vraćati.
- U postupku javnog oglašavanja Ministarstvo privrede TK ne snosi nikakve troškove učesnicima na Javnom pozivu, te zadržava pravo da poništi Javni poziv.
- U slučaju nedostatka sredstava u Budžetu Kantona obustavlja se realizacija dodjele sredstava u potpunosti ili djelimično, srazmjerno nedostajućim sredstvima.

MINISTARSTVO PRIVREDE TUZLANSKOG KANTONA